

natione agant, ordine naturæ tamen de Christô prius agendum, *prædestinati enim sumus in Christô*, Ephes. I, 4. Distinguendum inter decretum de incarnatione Christi, & executionem hujus decreti. Prioris ratione electi fuimus ab æternô, incarnatio Christi autem in tempore est facta.

I. CHRISTUS.

1. Distinguendum inter nomina *abstracta*, & *concreta* quæ in hóc articulo usurpantur.
2. Abstracta vel dicuntur *abstracta nature*, vel *abstracta personæ*. Priora sunt, quæ alterutram naturam denotant sine connotatione hypostaseos, ut si nomino humanitatem, divinitatem; posteriora sunt illa vocabula, quæ formaliter alterutram naturam exprimunt, sed cum connotatione hypostaseos. Sic ejusmodi nomen est *DEUS-HOMO*.
3. Hujus generis nomina alia sunt *incomplexa*, ut *DEUS homo* &c. alia *complexa*, ut *Deitas incarnata*, *Humanitas adsumta*.
4. Concreta vocabula vel sunt *concreta naturarum*, vel *concreta personæ*. Priora sunt nil aliud quam abstracta personæ, quando dico *DEUS*, *homo*; Posteriora sunt vocabula, quæ personam Christi in duabus naturis consistentem indicant.
5. Hæc vocabula vel immediatè personam ab utrâque naturâ denominant, ut si dico *Ἰεσὺς Χριστὸς*, vel mediatè denominant personam ab attributô communi, ut si vocatur *Immanuel*, denominatur Christus secundum utramque naturam. Vel desumitur denominatio ab officio communi, ut nomen *JESU*, quod Salvatorem significat. Inter hæc nomina, quæ dicuntur concreta personæ, excellit *nomen Christi*, denotat hoc personam constantem è naturâ, quæ ungit & constantem è naturâ, quæ uncta est.
6. Distinguendum inter Messiam seu unctum *Typicum*, & *Antitypicum*. Usurpârunt hoc vocabulum in Veteri Testamento, præprimis sacerdotes & reges. Dicebantur uncti seu Christi Domini, Es. XLV, 1. Nos posteriorem hóc locô spectamus.
7. Unctus est non oleô *externô*, sed *internô*, Spiritu Sanctô, Pf. XLV, 8. Dan. IX, 25. 26.
8. Alia est denominatio, quando hæc persona vocatur *Filius DEI* vel *λόγος* alia, quando dicitur *Christus*. In re quidem una persona sunt,